

Parit tersumbat lebih enam tahun

BUKIT ROTAN - Lebih enam tahun penduduk di Taman Kasawari, di sini berdepan dengan masalah longkang tersumbat dan ancaman nyamuk meskipun masalah itu diajukan kepada pihak berwajib.

Penduduk, Abdul Basar Sulaiman, 36, berkata, bukan sahaja air tidak mengalir dengan sempurna, bahkan penduduk turut berdepan bau busuk setiap hari gara-gara longkang tidak diselenggara dengan baik.

“Kita bayar cukai setiap enam bulan sekali bagi mendapatkan khidmat yang baik dan tidak dinafikan kerja kutipan sampah dan pemotongan rumput di kawasan ini dilaksanakan dengan baik.

“Tetapi bila kita ajukan masalah penyelenggaraan longkang, sehingga kini masih belum ada perkembangan positif,” katanya ketika ditemui *Sinar Harian*, semalam.

Seorang lagi penduduk, Mohd Nizam Mohd Nor, 45, berkata, dia berharap pihak berwajib dapat melihat masalah ini dengan lebih teliti lebih-lebih lagi menjelang Pilihan Raya Umum ke-13 (PRU13) ini.

“Kita sudah tidak sanggup lagi berdepan dengan masalah nyamuk dan bau busuk sehingga menyukarkan kami untuk berada di luar rumah pada waktu malam ketika menganjurkan sesuatu program keramaian,” katanya.



Abdul Basar (kiri) bersama Mohd Nizam menunjukkan longkang yang dipenuhi air hitam dan berbau busuk.